


WAAKHALIHA MATIYAAKONO

 Ni, ti yeeyo, wira yoopacerya waakhaliha matiyaakono amosa-amosa mukereja. Ni ekereja ahu yaamukhaani va ti yootaphuwa. Eyo kherina hata muromolelo nnakhala etthu wira yaaveleelihe matiyaakono aya, enaathanla matiyaakono aya. Enimuthanla pastore aya, enaathanla maatimistratoore aya, enthanla sothene sinkela ni sinkhuma mukereja. Khaavo mutthu orina oruma vasulu va etthu p'itthu, ti ekereja. Ni ekereja t'ale anrwa ni ankhaliherya ekereja ni okhala waya vaava, ni sanamuloko saya ni soovaha, ti yaawo kweekwe arina oruma yoohimya mwa malamulo yo waakhaliha awo.

² Ni kintthuna kaaxukhuru nikhuru na matiyaakono nivinre, ni kinihimya okhuma va wa ekereja yothene. Vakhala wira khula mmosa w'axinna awo ari vaava, yaawo yaari Munna Cox, Munna Fleeman, ni Munna Higginbotham ni Munna Deitzman, awo aanivarela muteko wooreera, ahaavarela Apwiya, mutapernakulu mu.

³ Ni okathi mwa okathi, voolikana ni malamulo a ekereja, khula mwaakha, matiyaakono wala maatimistratoore naanaanoru awo anoomaleliha okathi aya. Ni yaatthunaka otthika, vaareera. Yaahitthune otthika, vano pooti oheliwa mutthu vooপুরoni vaya, nikhuru nla nihiyalaya.

⁴ Nto ohiyu uwo miyo kaahitthana nikhuru na maatimistratoore, okhalaka wira nookhala nikhuru na maatimistratoore na naanaano. Koomuweha Munna Luther McDowell va ohiy'ula, nootteeleliwa murima omoona owo ni hiyo, yoowo aari munikhuruni na maatimistratoore khalayi. Kaahirowa esumana ela oweha wira koone sinto naamuwerya opakha epaphelo ekina, enrowa oruuheliwa ekereja, nave. Wira maatimistratoore a ekereja vano ti Munna William Morgan, Munna Mike Egan, ni Munna Banks Wood, ni Munna Roy Roberson. Ni othene aya t'a epooma yeela, omuhiya Munna Roberson onkhala eriyari ya ipooma iyo piili. Apwiya arimoona erattelo mwa axilopwana awo, ni awo annikhalaka axilopwana oottittimiheya, nto vano awo ahaakhela muteko ntoko maatimistratoore a ekereja ela.

⁵ Vano nto okathi muthukumano ola wiiraneyaaya, ni khuhimmwa ni pastore namakhaliherya wira hiyo, mwa othanliwa wa nikhuru na matiyaakono na naanaano, wira ala yaarumeela okathi aya ni—ni khuhiya, nto vaari wira athanliwe matiyaakono makina. Vano, ekereja... Enamuna ela eniiriwaaya, ti, nikhuru pooti waahimya matiyaakono, alopwana awo yaakhalanne aya opatthana khuphwanya wira yaari alopwana oottittimiheya ni a xariya.

⁶ Muteko wa tiyaakono ti muteko muulupale, ni nttittimiho muulupale w'Apwiya okhala tiyaakono mukereja. Nto siiso, vamuthukumanoni ohiyu uwo, kaahileeliwa sa mulopwana mmosa. Ni vathukumanne ahu ni pastore, yootharelana... Namathanu ela yookiserya, mulopwana ola ahikupalela wira ala yaari axilopwana oottittimiheya ni a xariya.

⁷ Mmiravo mmosa awo yaaphwannye-aya, khaaphwanelela oratteene (kahi mwaha wo wira khaari mutthu oolikanela), mmosa aahimmwe ni mmosa wa axilopwana a nttittimiho a nikhuru nahu na maatiministratoore. Masi okathi pastore ni miyo nithukumanne ahu, ni kikoha munnuwelo wa mmiravo owo, owo aarina ntoko miyaakha miloko miili. Mutthu oottittimiheya, naxariya, ni mutthu eekeekhai, masi khuphwanya wira owo aari mulopwana oohithela. Bibilia ontthuna wira tiyaakono akhaleke mulopwana oothela. Owo ohaana okhala iya a muthiyana mmosa.

⁸ Vano nto mulopwana mukina aari mutthu oottittimiheya saana, oophwanelela saana muteko ni aarowa okhala mulopwana ooromeleya, ntoko munna mmosa aamuthanlale awe. Vano nuumala waavyaavya mwaha ene, wira munn'owo aammala—ru okela moWaaminini mu, amwaar'awe khanaamini Yoola. Nto eyo yaahimukhaliha mulopwan'owo oohiphwanelela muteko. Okhala wira ohaana okhalana ethhoko awe yothene yoowiiwelela, awo nave ahaana okhala moWaaminini, okhala wira waamukhala ohiiwanana.

⁹ Ni hiyo ninooteka vano, ni nintthuna okhaliha voopuroni ekereja ela. Ni ntoko mulipa—oowehexexa a ekereja yothene, kihaana okhapelela wira ehaana okhalihiwa, mwa Yoolempwa, sothene voolikana mwa Masu.

¹⁰ Vano tivo, nto, aphwannye yoophwanelela ni nikhuru n'anamahoolela ni pastore, ni mulipa—oowehaxaxa, wira athanliwe nikhuru nla n'atthu va axilopwana amosa—amosa hiyo ninuupuwelahu okhala atthu oottittimiheya ni a xariya. Hiyo ninwerya owooniherya paahi. Ni ti, vano, awo aniheliwa ni ekereja, ni othanla waya yaawo. Vano nto axilopwana ala anrowa orumeela, yoonaru wira anookupali muteko ola. Vano animoorwa wa okathi vakhani, wira yoone vakhala wira annoona wira Muluku oowiihana. Ni vakhala wira ohoolo waya, awo yoona wira khamphwanelela, nto, aakhalana ehakhi isumana vakhani sinttharelana yo ohiya muteko, wira mutthu mukina aheliwe voopuroni vaya.

¹¹ Vano nto, wopaceryani wa muhakalaliho wira (Muluku atthuna vale) kinthuna kikhalihe vaava mutapernakulu mu kimalakaru omumula vakhani, muumala miyo—nuumala miyo...nininimwaakhaliha matiyaakono ala niwiixaatheryaka matata, matiyaakono ni namasuka musurukhu ekereja yeela. Masi yoopacerya awo ahaana oheliwa ni—ni woona moota

anuupuwelaaya ni moota muthukumano onuupuwelaaya. Vano yakhala—yakhala saana ipante soopiili, nto ninimwaakhaliha axilopwana ala matiyaakono, siiso ntoko Maatiministratoore anthanliwaya siiso.

¹² Ti otaphuwa ni malamulo a ekereja, ni Masu a Muluku. Tivo, eyo, awo khekhanle ohimmwaka paahi wira “Miyo kinoona wira mulopwan’ola aamukhala oophwanelela,” kahi yeeyo, “Munna Neville onuupuwela wira mulopwan’ola aamukhala mutthu oophwanelela,” wala “nikhuru na maatiministratoore anuupuwela wira mulopwan’ola aamukhala mutthu oophwanelele.” Ehaana okhala ni ekereja! Khaavo oniira ethu mwaha wo othuna wawe va. Ti mwaathanle a ekereja. Ela ekereja yootaphuwa.

¹³ Malamulo a khalayi aahononeya osareya wa maasi wa 1937. Hiyo noolepa-tho, ni enoothomeiwa vaxirini va vahilekenle, miteko sa maatiministratoore, matiyaakono, anamasuka musurukhu, ni sikina, pastore, axirikha, ni sikina.

¹⁴ Ni mahala a Muluku, kooleeliwa, ni mwaathanle a ipursentu emiya emosa a nikhuru na ekerej’ela, aphwannye wira Munna Hollin Hickerson mulopwana naxariya, oottittimiheya, ni oolikanela opuro ola wira aakhele n—nttittimiho muulupale wo okhala tiyaakono a etapernakulu ela.

¹⁵ Nave-tho, noophwanya, nave ni mwaathanle a nikhuru, wira Munna Collins nave-tho oophwanyiya okhala mulopwana oottittimiheya ni naxariya. Okhala wira murumeyi, yoowo ene, tivo hiyo naamunvekela wira arwe ni akhale ti—tiyaakono a ekereja; ni kahi tiyaakono paahi, masi oomukhaliherya Munna Neville, ni khino mwa ekelaase ya exikola ya Ttiminku, wala okuxa nipuro na Munna Neville, wala sothene oniithaneliwaawe wira akhale ootakaihana ni Munna Neville. Owo ti Munna Collins.

¹⁶ Ni, nave-tho, ekereja, ennikupalela, wira Munna Tony Zabel, mulopwana oottittimiheya ni naxariya, ni ookupaleliwa ohoolo wa nikhuru na maatiministaratoore ni mapastore, wira ninvekele wira aakhele muteko wa tiyaakono etapernakulu ela enihimmwa.

¹⁷ Ni oovekelikiwa nave-tho, ni khuphwanyiya okhala mulopwana oottittimiheya eriyari ahu... (Kahi... kahi ala akhanle paahi axilopwana oottittimiheya, vano, masi ale paahi athanliwe nnikhuru.) Munna Taylor a oHenryville, ahiiso Memphis, kookupali wira ti siiso, Memphis, Indiana. Owo onnikhala ni hiyo mwa okathi, avaraka muteko ntoko namukhora ni sothene saakhanle oweryaneyaka. Wira ekereja yoomukupali, ahiiso nikhuru n’anamahoolela ni pastore, wira owo akupali mu—muteko muulupale ntoko tiyaakono a etapernakulu ela enimmwa.

18 Ni yoovekeliwa wira mutthepa a Munna Mike Egan, Munna—Munna Bob Harned, oothanliwa nnikhuru nave ni mapastore, wira akupali muteko wa namasuka musurukhu wa etapernakulu ela enihimmwa, okhanle muteko woottittimiheya, ni onvekela exariya ni nttittimiho.

19 Kiiraka yeela, kinoona wira, axinn’aka, wira kooromolakani okhuma va, wira waamukhala nttittimiho muulupale wa nyuwo. Ni kahi yeeyo paahi, masi etthu yo wira.

20 Okathi ola kinrowa onvekela Munna Neville, muxirikha ahu, wira asome soothuneya sa tiyaakono. Munna Neville, xontte musome Mmasuni a Muluku. [Munna Neville ommusoma Timoteyo Oopacerya 3:8-13—Mol.]

[Siiso-tho matiyaakono akhaleke ooreera murima, ekhaleke a ekeekhayi, ehikhaleke anamuhapaliwa, ehiphaveleke muhakhu voohezariya;]

[Yeetteleke ekeekhayi yo waamini ni murima wooreera.]

[Nave-tho ala apaceryeke owehiwa; nuumala erumeleke muteko wa otiyaakono, nuumala wooniwa okhala a exariya.]

[Siiso-tho athiyana ekhaleke ooreera murima, oohaapa, oowiiisumaaliha, oororomeleya mwa sothene.]

[Matiyaakono ekhaleke alopwana a muthiyana mmosa, aweettihaka oratta-ene an’aya ni itthoko saya.]

[Okhala wira ale anvara oratta-ene muteko wa otiyaakono anniphwanyiha nttittimiho wooreera, ni nrromelo nuulupale mowaaminini ori mwa Kristu Yesu.]

21 Amen. Kaatthuna okathi ola kaavekele axinna ala yitthaniwe, wira xontte arwe ohoolo nno vaplataforma okathi vakhani paahi. Ni nuuramaka muru okathi vakhani paahi wira nivekele, kintthuna wira awo...Ni ekereja ennisuwela exeeni ela, wira nno othanla nikhuru nanyu na matiyaakono ni namasuka anyu a muhakhu.

22 Pwiya Yesu, onkhala ni muupuwelo wowiiyeviha, ni wa nttittimiho ninrwaahu wa Nyuwo vano. Ninrwa nittittimihaka Masu Anyu Oowaaryaxa, ninrwa naaminiki wira “Moolumo othene a mutthu ekhale oovonyeya, masi a Muluku akhale eekeekhai.” Ni ninnooxukhuruni Nyuwo mwaha wa Ekerej’ela Yesu othumme awe ni Ephome Awe yooreeraxa, ni khunivaha emp’ela wira nikokhoreleke-mo.

23 Ni ntoko alipa-oowehaxaxa a nikoto nla nuulupale, nenlo Erooho Yoowaarya enitthokihalyaya wira nikhale, hiyo nimphavela vano wooniherya muthukumano ola nikhuru, na axilopwana oororomeleya ni a xariya ninaamini ahu wira t’osareya Erooho ni oolikana wira evare muteko.

Ntoko yaahimmwe aya emaara emosa vanaasiwa nikhuru na matiyaakono, “Mwaathanle varyari vanyu, atthu oororomeleya ni a Erooho Yoowaarya, wira arumeele enamuna yeela, wira yaakhapeleleke anaamukhweli ni ikhwaasuni, wira akaweke musurukhu, ni okhapelela mukhalelo wooreera wa ekereja.” Miyaakha ohoolo waya, ninoomalaru osoma soolepa soowuupuxeriwa owo muulupale, Paulo, oowaarya, yoowo oruuhale yoohimya ya Soolempwa sa sootthuneya sa nipuro nlo.

²⁴ Muluku, mwaattitimihe axilopwana ala. Nto vano p’uthanla, Pwiya, ntoko ekereja yootaphuwa, ntoko erutthu ya Pwiya Yesu, awo anthanlaya. Ni...[Nipuro vahiitthu mufiitani—Mol.]...ni mweettiherye epantte ela ya muteko enamuna emosa yoosuwanyeya, mwa Nsina nenlo na xariya ni noowaarya na Yesu.

²⁵ Vano ni muru ahu woowuurama, kahi muru paahi masi murima, ni ntoko mempuru othene a ekereja ela, onoorwa khula mahiku ni munkhaliherya ni yanamuloko anyu ni soovaha, yoowo onihimmwa okhala mempuru a ekereja yeela, okathi pastore ni miyo, paahi, ninwehaahu, pastore ootakaihana, Munna Neville, ni miyo ninwehaahu, kaatthuna kikohe sintoko ekereja ela ennimoonna Munna Taylor okhala mulopwana naxariya ni oothanleya, mwa muupuwelo anyu wooloka, wira akhale tiyaakono wa nikhuru nla n’atthu? Munimooniherya eyo nvenxaka ntata nanyu. [Munna Branham onoomaala—Mol.] Vaareera. Vano aakhanle-ene onvirikanya, avenxe ntata. [Munna Branham onoomaala.] Kooxukhuru.

²⁶ Aakhala amosa-amosa wa mamempuru ala a ekereja yeela va onihimya. . .ni othene, munnimuhimya Munna Hollin Hickerson okhala mutthu naxariya ni oottittimiheya, ni mutthu owehiwe vamaithoni vanyu ophwanela okhala tiyaakono a ekereja ela onihimmwa? Mooniherye nvenxaka ntata noolopwana. [Munna Branham onoomaala—Mol.] Yakhala voovirikana, vano nvenxe ntata. [Munna Branham onoomaala.]

²⁷ Muthukumano ola onnimpchwanya Munna Collins okhala siiso, mulopwana naxariya ni oottittimiheya, ni oophwanela muteko wo okhala tiyaakono a ekereja ela? Nvenxe ntata. [Munna Branham onoomaala—Mol.] Vaareera. Voovirikana, nvenxe ntata. [Munna Branham onoomaala.]

²⁸ Muthukumano ola onnimpchwanya Munna Tony Zabel okhala mutthu oottittimiheya ni oophwanela muteko ola, wo okhala tiyaakono wa nikoto nla mukereja mu onihimmwa? Nvenxe ntata noolopwana. [Munna Branham onoomaala—Mol.] Voovirikana, nvenxe ntata. [Munna Branham onoomaala.]

²⁹ Muthukumano ola onnoona wira Munna Harned mutthu a nneema ni naxariya, yoowo onkhalaka ni hiyo mwa okathi khata, wira akhale namasuka musurukhu, namasuka musurukhu sakartaari a ekereja ela, wira okhapeleleke muhakhu aya ni oliva

ikontha saya? Vakhala siiso, nvenxe ntata noolopwana. [Munna Branham onoomaala—Mol.] Yaakhanle-ene etthu yovirikana, nvenxe ntata noolopwana. [Munna Branham onoomaala.]

³⁰ Kaatthuna kaahimeerye a—axinna yeemenle okathi ene yoola, waattamela vamwiikimanyo va, wira ekereja ela, ni ipursento emiya (khaavo hata mmosa ovirikannye), anoohimiyani okhala othene oophwanela vamaithoni va Muluku wa muteko ola Muluku owiitthanenlyaaweni.

³¹ Vano, nyuwo, ntoko sihimmwale aya, “Ala apacerye owehiwa, ni wooniwa vakhala wira annitthuna muteko ola.” Muhina mwa isumana vakhani, Muluku atthuna vale, kinootthika wira kiwiixaatherye matata nikhuru nla na axilopwana, wira naakhalihe maatim- . . . ahiiso matiyaakono a ekereja ela, ni namasuka muhakhu.

Nrowe nuurame muru okathi vakhani paahi:

³² Pwiya, hiyo ninnitteeliwa murima ohiy’ula wira aakhala athu nlelo ankhala mulaponi anwerya weetta vooreera murima ohoolo wa olumwenku; vooreera-vo murima mpakha etapernakulu, ni malamulo oolipa ntoko ela erinaaya, enwerya waathanla axilopwana athanu waahela voopuroni ntoko ahooleli aya, ohikhanle hata mwaathanle mmosa oovirikanya. Hiyo nootteeliwa murima mwaha wa yaawo, ni ninnoona wira Nyuwo mwaari ni hiyo nithanlaka siisa, nikhuru n’anamahoolela ni hiyo mapastore.

³³ Muluku, mwaareerihe axilopwana ala. Ni wira arumeele muteko ola ni murima aya wothene, asuwelaka wira eyo ennaaphwanyiha opuro muulupale Wirimu. Nihiku nlo okathi Iliivuru sa Wirimu sinrowaaya otthukiwa, Eliivuru ya ookhala a wirimu ni Muliivuruni yuulupale ya Wirimu sinrowaaya okhunliwa, masina aya ekhale ipursentu emiya ohoolo wa Muluku ni Moopoli ni ikuru sothene sa Wirimu, wira akhale mmosaru Momweneni mw’Awe. Mwaareerihe, Pwiya, ni wira awo erumeele muteko ola oratta-ene. Mwa Nsina na Yesu hiyo ninnooxukhuruni mwaha wa yaawo. Amen.

³⁴ Kintthuna ovahana matata ni nyuwo paahi, Munna Harned, ni Munna Zabel, ni Munna Collins, Munna Hickerson, ni Munna Taylor. Kootteeliwa murima saana osuwela wira ninnikhalanaka opatthana okathi ola wothene ni axilopwana oottittimiheya saana. Muluku ooreeriheni vano. Ni ninoowoonani vahilekenle, kimalakaru omumula vakhani, wira kitthike, ni woona moota onosivelayani muteko anyu. Vaareera, mwaha wo othanla waya, kinoona wira yaari ipursentu emiya, nnakhala emosa yovirikanya.

³⁵ Oh, khamuntteeliwa murima mwaha wo opatthana n’atthu olelo anwerya okhala ohoolo wa Muluku, vooreera murima, ni okhala molumwenkuni ola vano mwa mukhalelo yoowo? Eyo etthu yooreerexa.

36 Ni kootteeliwa murima osuwela ohiy'ula wira kookhalana oreeriwa w'o—w'okhalana axilopwana ala ni ekerej'ela wira akhale apatthani aka. Kootteeliwa murima Muluku ookitthuniherya opatthana ni Ekereja Awe molumwenkuni mothene. Oh, awo t'othanyiwa ni ookhoottiwa ni annilavuliwa, ni ntoko sihimaly'aka voosiis'ula mmutthakani mwaka, khino anamawolowa mattophe paahi, enamuna olumwenku onaawehaaya yaawo, ntoko "nikhuru n'anamathipelela," masi Muluku onaaweha ntoko an'Awe. Miyo nkireere otteeliwa murima mwaha wa yeeyo. Awo pooti ohiwerya woohimeeryani imiilya kavi sikhanel mpakha omweerini. Awo khino khanwerya wooleelani mukhalelo wa nsuwa wothene ni moota onvaraaya muteko. Masi yookhala etthu emosa awo ansuwelaya, awo annisuwela okathi ayariwaaya vasya. Kinnitteeliwa murima saana mwaha wa yaawo.

37 Ni ntoko nlikanyiho naamukhaani kiixuttaly'aka, ni kinrowa olikanyiha ohiy'ula ni axaana aka aili athiyana wira nisuwele orateene, okhaliha y'ekeekhai wa hiyo, wira nyuwo musuwele saana yoohimya ya yeeyo. Voosiisu umosa, kivenyaka voolilini. . . kookhalana axiruusi aili. Mmosa aya ti Rebekah, nto mmosa aya ti Saara, ni awo axiruusi a paapa.

38 Ni kookhalana mwammiravo, Joseph. Miyo kaamutthika okhuma oChattanooga, vamuthukumanoni ohiyu omosa, okathi waaryaaka weiwo ekampaanya ela yookiserya. Nto miyo kaari mu—mukaaroni, kirowaka ni mwan'aka muulupale, Billy. Amwaar'awe ni Meda yaari mukaaroni, n'axiruusi. Nto okathi neettaahu nirowaka, khaavo aahimye etthu ovira ikwarterawu sinci-ene sa mmuttettheni. Ni miyo kaaroolavula voolipa-vo ni athu ohiy'ule mwaha wa enamuna awo yiiraaya. Ni khaavo aahimye etthu. Nto Yosefe mwaamukhaani khukaattamela khukivara vanikhatani, owo khwira, "Paapa, vekeekhai nyuwo khimureere olaleya ohiy'ula!"

39 Nto voosiis'ula, okathi waakhumaaka kirowaka Ephiro Yaneethanu neeraru ni Yanamuloko, e. . . ahiiso Penn ni Yanamuloko, kiireke, khaavo aahimye etthu, amwaar'aka ni axiruusi oowaili. Nto Joseph mwamukhaani khuvarela-tho nikhata naka, owo khwira, "Paapa, eyo, vekeekhai wookisivela olaleya iwe voosiis'ula," owo khuhimya.

Miyo khwira, "Ahe, kihaana namasiveliwa ni miyo, owo mwan'aka."


40 Nto wa yoohimya ahu yaamukhaani. Voosiisu omosa, kikilaanthi-ene vasaala, Becky mwaamukhaani aahirwa atthimakaka nto, khwira, owo khukilaathi ntoko vakhalavaloni vamwettoni vaka khukipatikha vano owo mwaaruusi a paapa. Nto owo aarookipatikha. Ni Saara mwamukhaani khutupha voolilini vawe ni pixama awe ekhaani ni, moone, khurwa

atthimakaka voottharana. Owo mwaamukhaani a maitho ookhwila.

⁴¹ Becky mwaamukhaani khwira, “Oh, Saara, khivantthuneya nyuwo orwa, okhala wira kookhalana Apaapa othene yoomi. Apaapa othene t’awaka!” Nto Saara mwaamukhaani, iyano sawe sikhaani khumora, maitho awe makhaani ookhwila khusareya maithori. Miyo khwiittikinya *sa* ni khukhaliherya nikutha nikina, nto owo khurwa khukilaathi vaavo ntoko vakhavaloni.

⁴² Becky orina metto soorakamaxa, iyo saaniphiya vathi. Saara mwaamukhaani khaalipalimpe, vano miyo khumpweherya miyoono soomiili Saara. Saara mwaamukhaani khunweha Becky khwira, “Becky, khino nyuwo mookhalana Apaapa othene, masi Apaapa aakikhalana miyo othene!”

⁴³ Ni kinoona wira ti siiso ery’aya va. Hiyo pooti ohimusuwelaka teyoloxiia othene ni moolumo othene maalupale a Ekereku, nikhuru nla n’atthu khino khaninsuwela. Masi yookhala etthu yoolipiheriwa, miyo kinnaamini wira Yesu oonikhalana *hiyo* othene. Amen.

Vaareera, Munna Neville. 

58-0720E Waakhaliha Matiyaakono
Branham Tabernacle
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org